

Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/345
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 201802523

Tiranë ___/___/2019

Lënda: Rekomandime për inspektimin e bërë në ambientet e Komisarariatit të Policisë Nr.2, Tiranë.

Drejtuar : Z. Gilbert HOXHA
Shef i Komisarariatit të Policisë Nr.2

TIRANË

Për djeni: Drejtues i Parë, Z.Kastriot SKËNDERAJ
Drejtori i Drejtorisë Vendore të Policisë

TIRANË

I Nderuar Z.Hoxha,

Avokati i Popullit, në rolin e Mekanizmit Kombëtar për parandalimin e torturës, trajtimit ose dënimit të egër, çnjerëzor ose poshtëruës, në vijim Mekanizmi Kombëtar¹, bazuar në nenin 19/1 të ligjit nr. 8454, datë 04.02.1999, "Për Avokatin e Popullit", i ndryshuar, kreu një inspektim në Komisariatin e Policisë Nr.2 Tiranë.

Inspektimi u krye në datën 21.09.2018, sipas një Plani Inspektimi të miratuar më parë nga Avokati i Popullit. Në përbërje të grupit inspektues ishin Znj. Ermonela Xhafa me detyrë Komisionere e Mekanizmit Kombëtar për Parandalimin e Torturës, Z.Genci Tërpo, dhe Z.Alfred Koçobashi, me detyrë Nd/Komisionerë pranë Mekanizmit Kombëtar për Parandalimin e Torturës.

Inspektimi kishte si qëllim verifikimin e respektimit të standardeve të përcaktuara në Ligjin Nr.108/2014, "Për Policinë e Shtetit", në "Rregullat dhe Proçedurat Standarde për Trajtimin dhe Sigurimin e Personave të Arrestuar dhe Ndaluar në Njësitë Policore", miratuar me Urdhrin e Drejtorit të Përgjithshëm të Policisë së Shtetit, Nr.1102, datë 07.11.2017, "Për trajtimin dhe sigurimin e personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", dhe në "Rregullat teknike të shoqërimit në polici", miratuar me Urdhrin e Drejtorit të Përgjithshëm të

¹ Neni 74/1 i ligjit nr. 8328, datë 16.04.1998, "Për të drejtat dhe trajtimin e të dënuarve me burgim dhe të paraburgosurve", i ndryshuar.

Policisë së Shtetit Nr.306, datë 31.03.2016, si dhe zbatimin e rekomandimeve të Avokatit të Popullit të bëra gjatë inspektimeve të mëparshme.

Pasi u njoh me konstatimet e grupit inspektues, Avokati i Popullit ka detyrimin kushtetues dhe ligjor t'ju parashtojë konkluzionet përfundimtare, duke ju referuar si më poshtë vijon:

1. Shënime paraprake

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi i punës u takua me Drejtuesin e Komisarariatit dhe u vu në dijeni lidhur me qëllimin e inspektimit i cili angazhoi N/Komisararin, Z.Roven Zeka, me detyrë Shef i Seksionit të Patrullës së Përgjithshme në Komisariatin Nr 2. Tiranë i cili raportoi për grupin e inspektimit, mbi masat e marra për realizimin e rekomandimeve të lëna nga Avokati i Popullit vitin e kaluar, lidhur me përmirësimin e kushteve sipas procedurave standarde të ambienteve të shoqërimit dhe dhomave të sigurisë të këtij komisarati.

Drejtuesi i Komisarariatit gjithashtu angazhoi punonjësit e policisë së ambienteve të sigurisë dhe përgjegjës të ambienteve të shoqërimit këtij institucioni që të ishin prezent për të bashkëpunuar dhe për të shërbyer në vijim të procesit të inspektimit.

Grupi inspektues, pasi mori informacionin e nevojshëm lidhur me qëllimin e inspektimit, vijoi takimin me punonjësit përgjegjës të dhomave të sigurisë dhe të dhomave të shoqërimit që na u bashkuan gjatë evidentimit të kushteve të këtyre ambienteve në godinën aktuale të Komisarariatit Nr.2 Tiranë.

Theksojmë se, të gjithë punonjësit e Komisarariatit të Policisë Nr.2 Tiranë me të cilët kontaktuam u treguan bashkëpunues gjatë komunikimit dhe inspektimit, që zhvilloi grupi inspektues në ambientet e këtij institucioni.

Grupi i punës në vijim inspektoi ambientet e shoqërimit, disa zyra të punonjësve të policisë, si dhe u njoh me dokumentacionin përkatës ku pasqyroheshin veprimet e kryera me personat e shoqëruar dhe të arrestuar apo ndaluar.

Nga rekomandimet e lëna një vit më parë nga Avokati i Popullit, **u konstatua se ishte përfunduar rikonstruksioni, i 2(dy) ambienteve të sigurisë** sipas standardeve të përcaktuara në ligjin nr.108/2014 “Për Policinë e Shtetit”, i ndryshuar dhe në “Rregullat dhe Procedurat Standarde për Trajtimin dhe Sigurimin e Personave të Arrestuar dhe Ndaluar në Njësitë Policore”, miratuar me Urdhrin e Drejtorit të Përgjithshëm të Policisë së Shtetit, Nr.1102, datë 07.11.2017, “Për trajtimin dhe sigurimin e personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, **duke i paisur këto ambiente me orenditë e nevojshme, me qëllim ofrimin e kushteve të përshtatshme dhe dinjitoze.**

Ishte plotësuar rekomandimi i mëparshëm për marrjen e masave të nevojshme me qëllim plotësimin me saktësi dhe përgjegjësi të rubrikës “Të dhëna për njoftimin e familjarëve/afërmeve” në regjistrin e personave të shoqëruar. Nga kqyrja e këtij regjistri u konstatua se rubrika mbi njoftimin e familjarëve dhe të afërmeve përmbante përveçse emrit të personit të njoftuar edhe lidhjen me familjarin dhe personin e shoqëruar si dhe numrin e telefonit përkatës ku ishte bërë njoftimi.

U konstatua se ishte plotësuar rekomandimi i mëparëshëm për marrjen e masave për zbatimin me rigorozitet të urdhrin nr.306, datë 31.03.2016 të Drejtorit të Policisë së Shtetit “Procedura standarde “Rregullat teknike të shoqërimit në polici”, **duke respektuar detyrimin e mbajtjes së dokumentacionit të përcaktuar** në këtë urdhër, si dhe **të pajisjes së personave të shoqëruar me procesverbalin e veprimeve të kryera** nga punonjësi i policisë me personin e shoqëruar.

U evidentuan disa praktika të njëpasnjëshme ku në përfundim të procedurave dhe veprimeve të kryera nga punonjësit e policisë në Komisarriatin e Policisë Nr.2 Tiranë, **mbaheshin procesverbalet përkatëse ku një kopje e të cilit firmosej dhe i jepej personit të shoqëruar.**

Ishte plotësuar rekomandimi i mëparëshëm për marrjen e masave **për vënien në funksion të dusheve në ambientet e sigurisë**, me qëllim ofrimin e kushteve të higjenes vetjake për këtë kategori.

Nuk ishte realizuar rekomandimi për marrjen e masave të nevojshme për krijimin e zyrave ku merren në pyetje personat e ndaluar/arrestuar para se të dërgohen në ambientet e sigurisë **duke instaluar sistemi i monitorimit me kamera në këto ambiente.**

Në përfundim të inspektimit grupi monitorues konstatoi se, në ambientet aktuale në Komisarriatin e Policisë Nr.2 në Tiranë, vazhdonin të ishin të pranishme disa problematika dhe konkretisht:

2. Ambientet e shoqërimit dhe kushtet e tyre

Në Komisarriatin e Policisë nr.2 Tiranë, kishte 2 (dy) ambiente shoqërimi të ndërtuara sipas parashikimeve të bëra në ligjin nr. 108/2014, “Për Policinë e Shtetit” dhe në procedurat standarde: “Rregullat teknike të shoqërimit në polici”, miratuar me Urdhrin e Drejtorit të Përgjithshëm të Policisë së Shtetit nr. 306, dt. 31.03.2016, me sipërfaqe dhe hapësira të bollshme për qëndrim, si dhe të ndara më vete për femrat, meshkujt madhorë dhe të miturit.²

Dhomat ishin me dimensione 4 x 3m me dritare e cila krijon mundësi për ajrim dhe ndriçim të plotë natyral, si dhe sigurohej ndriçimi nga rrjeti 24 orë pa ndërprerje. Dhomat ishin të lyera, të pastra dhe kishin tavolinë dhe stol për qëndrimin ulur të shtetasve.

Në ambientin e shoqërimit ishin vendosur postera me të drejtat ligjore të personave të shoqëruar. Në ambientin e shoqërimit në momentin e inspektimit nuk kishte shtetas të shoqëruar. Gjithashtu pranë dhomës së shoqërimit ndodhet dhe një tualet i cili ishte i pajisur me mjetet e duhura hidrosanitare dhe kishte ujë të rrjedhshëm.

U konstatua se në këtë komisarriat zbatohet detyrimi ligjor i parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimit të çështjes përkatëse.

² Kreu VI, pika 3 e procedurave standarde.

U evidentuan disa praktika të njëpasnjëshme ku në përfundim të procedurave dhe veprimeve të kryera nga punonjësit e policisë në Komisaratin e Policisë Nr.2 Tiranë mbaheshin procesverbalet përkatëse ku një kopje e të cilit firmosej dhe i jepej personit të shoqëruar.

Gjatë inspektimit u konstatua se në korridoret, në ambientin e shoqërimit të Komisarimit të Policisë Nr.2 në Tiranë ishin të afishuara posterat me të drejtat e personave të ndaluar/arrestuar, si dhe atyre të shoqëruar.

3. Regjistri i personave të shoqëruar, ndaluar/arrestuar dhe evidentimi i tyre

Në zbatim të ligjit nr.108/2014 “Për Policinë e Shtetit”, i ndryshuar dhe në procedurat standarde: “Rregullat teknike të shoqërimit në polici”, miratuar me Urdhrin e Drejtorit të Përgjithshëm të Policisë së Shtetit Nr.306, dt. 31.03.2016, çdo njësi policore që ka dhoma sigurie, duhet të jetë e pajisur, ndër të tjera, edhe me regjistrat përkatës. Regjistrat në Komisaratin e Policisë, Nr.2 Tiranë ishin të mbajtur në rregull.

Gjatë inspektimit u konstatua se në Komisaratin e Policisë, Nr.2 Tiranë, “Regjistri i evidentimit të të dhënave për personat e shoqëruar” ishte i tipit “Model nr. 1” konform me procedurat standarde: “Rregullat teknike të shoqërimit në polici”, miratuar me Urdhrin Nr. 306, dt. 31.03.2016 të Drejtorit të Përgjithshëm të Policisë së Shtetit dhe ishte i sekretuar.

Të gjithë personat e shoqëruar në organin e policisë sipas dispozitave të ligjit nr. 108/2014 “Për Policinë e Shtetit” regjistroheshin në këtë regjistër nga punonjësit e zyrës së informacionit.

Nga këqyrja e këtij regjistri rezultoi se: Koha e qëndrimit në gjendje shoqërimi të shtetasve ishte e ndryshme nga 1 deri në 10 orë në raste të veçanta. Rubrikat e regjistrat ishin plotësuar në mënyrë korrekte, me përgjegjësi dhe saktësi nga punonjësit e policisë³.

Në këtë komisarati ishte vendosur regjistri për personat e ndaluar/arrestuar, ku evidentoheshin të gjitha rastet e ndalimeve dhe arrestimeve të kryera nga punonjësit e këtij organi, i cili ishte i sekretuar.

Nga këqyrja e këtij regjistri rezultoi se në rastet e arrestimeve dhe të ndalimeve të personave të shoqëruar, ora e arrestimit/ndalimit përputhej me orën e shoqërimit të tyre në organin e policisë.

Nga këqyrja e librave të evidentimit të personave të ndaluar/ arrestuar dhe procesverbaleve, nuk kishte mospërputhje mes kohës (orës) kur ishin ndaluar apo arrestuar, me orën e shënuar në procesverbalet e arrestimit në flagrancë.

Ndërkohë u konstatua se në këtë komisarati kishte edhe regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse

³ *Kreu VII, Procedurat standarte: “Rregullat teknike të shoqërimit në polici”, miratuar me Urdhrin Nr. 306, dt. 31.03.2016 të Drejtorit të Përgjithshëm të Policisë së Shtetit*

parashikohet në nenin 115 të ligjit nr. 108/2014 “Për Policinë e Shtetit”, i ndryshuar, por nuk ishte evidentuar asnjë kërkesë apo ankesë.

4. Ambientet e sigurisë/kushtet e tyre.

Në Komisarlatin e Policisë Nr.2 në Tiranë mjediset e sigurisë përbëheshin nga 3 (tre) dhoma, me përmasa 3 x 3m, në katin e parë të ndërtesës së komisarlatit, dy ndër të cilat ishin rikonstruktuar së fundmi.

Dhomat ishin funksionale dhe të pajisura me shtretër. Tualetet gjendeshin brenda ambienteve të sigurisë, dhe dushet ishin funksionale. Kishte furnizim me ujë nga rrjeti 24 orë pa ndërprerje. Ambjentet e dhomave të sigurisë nuk kishin sistem ngrohjeje dhe ftohjeje.

U konstatua se në komisarlat kishte edhe një gjenerator për furnizimin me energji elektrike të dhomave të sigurisë por aktualisht ai kishte një difekt dhe kërkonte riparim. Gjithashtu u konstatua se kamera në korridorin e ambienteve të sigurisë kishte një defekt dhe nuk funksiononte.

Gjatë inspektimit u konstatua se në korridoret, në ambientin e sigurisë të Komisarlatit të Policisë nr.2 në Tiranë ishin të afishuara posterat me të drejtat e personave të ndaluar/arrestuar, si dhe atyre të shoqëruar.

Posterat me të drejtat ligjore të të ndaluarve/arrestuarve ishin të vendosura edhe në korridorin midis dhomave, si edhe lista me emrat dhe kontaktet e avokatëve të disponueshëm, ishin të afishuara.

Në ambjentet e sigurisë ishte edhe një dhomë e cila përdorej për marrjen në pyetje të personave të ndaluar apo të arrestuar nga prokurori apo oficerët e policisë gjyqësore dhe kjo e fundit përdorej edhe për takimet me avokatët.

Personat e ndaluar/arrestuar, pas kryerjes së procedurave me oficerët e policisë gjyqësore, dërgoheshin menjëherë në ambientet e Drejtorisë Vendore të Policisë Tiranë.

5. Trajtimi i të ndaluarve/arrestuarve dhe i të shoqëruarve në ambientet e policisë.

Në kohën e inspektimit në ambientet e shoqërimit në Komisarlatin e Policisë Nr.2 në Tiranë, nuk kishte asnjë person të shoqëruar. Ndërsa në ambientin e sigurisë ishin 2 (dy) persona të arrestuar.

Grupi i monitorimit intervistoi personat e arrestuar, të cilët konfirmuan se ishin trajtuar në mënyrë korrekte gjatë kohës së marrjes në pyetje nga oficerët e policisë gjyqësore dhe qëndrimit në ambientin e sigurisë.

Nga të intervistuarit nuk pati pretendime për trajtim denigrues, jo human apo për ushtrim dhune fizike e psikologjike. Gjendja psikologjike e të intervistuarve ishte e qetë dhe nuk dëshmonte për ndonjë pasojë të shkaktuar nga keqtrajtimi.

Shtetasit e intervistuar kishin dijeni për identitetin e punonjësit të policisë me të cilin kishin marrë kontakt dhe kishin kryer veprimet proceduriale. Ata shpjeguan se, gjatë ndalimit/arrestimit punonjësit e policisë ishin identifikuar përpara tyre duke u prezantuar me gjeneralitetet dhe detyrën që kryenin.

Personave të ndaluar/arrestuarve iu ishin dhënë nga oficerët e policisë gjyqësore kopje të procesverbalit të ndalimit/arrestimit, të kontrollit personal dhe të letrës me të drejtat e tyre.

Nga informacionet e grumbulluara gjatë vizitës nuk rezultoi asnjë rast i përdorimit të mjeteve të forcës dhe shtrëngimit fizik, si dhe asnjë rast i përdorimit të armëve të zjarrit nga ana e policisë ndaj shtetasve të ndaluar/ arrestuar me qëllim përmbushjen e një synimi të ligjshëm sipas dispozitave ligjore në fuqi.

Koha e qëndrimit të arrestuarve në ambientin e sigurisë ishte brenda afatit ligjor. Të ndaluarve/arrestuarve, në këtë komisariat, u mundësohej trajtimi me ushqim 3(tre) herë në ditë, me shërbim katering sipas normave për trajtimin me ushqim të përcaktuar në Vendimin Nr. 189, datë 15.03.2017 “Për trajtimin me ushqim të punonjësve, të studentëve dhe të kursantëve në institucionet arsimore të Policisë së Shtetit, si dhe të shtetasve të ndaluar dhe arrestuar deri në sqarimin e pozitës së tyre”. Ushqimi përgatitej nga një subjekt privat me të cilin ishte lidhur kontratë.

Ndonëse në ambientet e sigurisë nuk kishte ambiente kulti, të ndaluarve/arrestuarve që dëshironin u lejohej ushtrimi i riteve fetare brenda dhomave të sigurisë.

Të ndaluarve/arrestuarve iu jepeshin produkte për ruajtjen e higjienës vetjake dhe të ambientit, si sapun, detergjente, letra higjienike dhe letra për fshirjen e duarve dhe të fytyrës.

6. Ambientet e intervistimit

Në godinën aktuale në Komisaratin e Policisë Nr.2 Tiranë oficerët e policisë gjyqësore i kryenin veprimet proceduriale me shtetasit në zyrat e punës së tyre. Këto zyra nuk ishin të monitoruara dhe ndërkohë në këtë organ nuk kishte ambiente të veçanta intervistimi të monitoruara me kamera gjatë kryerjes së veprimeve proceduriale nga oficerët e policisë gjyqësore.

Lidhur me këto fakte Avokati i Popullit nisur edhe nga inspektimet e mëparëshme ka rekomanduar marrjen e masave për krijimin e zyrave të dedikuara ku merren në pyetje shtetasit gjatë kryerjes së veprimeve proceduriale nga oficerët e policisë gjyqësore dhe instalimin e sistemit të monitorimit me kamera në këto zyra por është konstatuar se sërish ky i fundit nuk është plotësuar⁴.

⁴ “Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkësë të bërë nga i ndaluari gjatë intervistës, si dhe të personave të pranishëm gjatë çdo interviste.”

CPT’ reports; Armenia: Visit 2010[par.18]

Proçesi i monitorimit filmik gjatë marrjes në pyetje të personave të shoqëruar është një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve apo arrestuarve, ashtu dhe nga vetë punonjësit e policisë së shtetit.

Gjithashtu, Komisariati i Policisë Nr.2 Tiranë në kushtet aktuale nuk posedon hapësirë të posaçme për biseda apo intervistim me persona të mitur, MKPT e konsideron me rëndësi të veçantë faktin se bisedat me fëmijët duhet të realizohen në një ambient të përshtatshëm që duhet të jetë i rregulluar në mënyrë të posaçme për zhvillimin e bisedave me fëmijët, pasi nga intervistimi i tyre në kushtet aktuale mund të shkaktohet traumatizim plotësues i fëmijëve.

Nga monitorimi që u bë në disa prej zyrave të punonjësve të policisë në godinën aktuale të Komisarariatit Nr.2 Tiranë, nuk u gjetën sende, prania e të cilave të ekspozonte dhunë tek personat me të cilët ata kryenin veprime proceduriale.

7. Ndhimja juridike, psikologjike dhe kujdesi mjekësor

Në këtë komisarariat zbatohet detyrimi ligjor i parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimit të çështjes përkatëse. Edhe në nenet 34/b. pika 2 dhe 251 të K.Pr.P parashikohet se të ndaluarit/arrestuarit duhet t’i jepet dhe të mbajë me vete një kopje të procesverbalit të ndalimit/arrestimit. Rezultoi se ndaj personave të shoqëruar nga punonjësi i policisë mbahej një procesverbal tip i emërtuar “Formulari i raportit të Shoqërimit ose Ndalimit/Arrestimit”.

Gjatë inspektimit, u konstatua se detyrimi ligjor për të njoftuar personat e ndaluar/arrestuar madhor që në mungesë të mundësive financiare për të pajtuar një avokat privat, kërkon ndihmë juridike, atij i ofrohej një avokat kryesisht dhe iu ishte krijuar mundësia për të kontaktuar me të. Avokatët siguroheshin nga lista e avokatëve të dërguar nga organi i prokurorisë, e cila ishte e afishuar në zyrën e përgjegjës të ambientit të sigurisë.

Gjithashtu u konstatua se në këtë komisarariat ofrohej edhe dhënia e akteve në gjuhë të huaj ku parashikoheshin të drejtat e personave të ndaluar për rastet e shtetasve të huaj

Në rastet kur të ndaluarit/arrestuarit ishin të mitur, veprimet proceduriale kryheshin në praninë e detyrueshme të avokatit mbrojtës të caktuar kryesisht dhe të psikologut që ofrohej menjëherë nga Drejtoria Vendore e Policisë Tiranë.

Përsa i përket trajtimit mjekësor të të ndaluarve/arrestuarve, u konstatua se ky shërbim ofrohej nga mjeku i Drejtorisë Vendore të Policisë Tiranë. Nga kqyrja e dokumentacionit për secilin person të ndaluar/arrestuar rezultoi se ishin kryer vizitat mjekësore brenda afatit 12 orësh.

Vizitat mjekësore ndaj të ndaluarve/arrestuarve, konstatimet, rekomandimet dhe mjekimet e dhëna pasqyroheshin në regjistrin e vizitave mjekësore. Ndërkohë hapeshin edhe kartelat

mjekësore (kartelat ditore) të tyre, të cilat vendoseshin në fashikullin përkatës për çdo të ndaluar/arrestuar.

Për sa më sipër dhe me qëllim zgjidhjen e problemeve të konstatuara gjatë këtij inspektimi, bazuar në pikën 3 të nenit 63 të Kushtetutës ku parashikohet se: “Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike” dhe në bazë të nenit 21/b të ligjit nr. 8454 dt.04.02.1999 “Për Avokatin e Popullit”, i ndryshuar, ku përcaktohet se: “Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”,

REKOMANDIMË:

1. Marrjen e masave të nevojshme për krijimin e zyrave të dedikuara ku merren në pyetje personat e ndaluar/arrestuar apo shoqëruar, gjatë kryerjes së veprimeve proceduriale nga oficerët e policisë gjyqësore dhe instalimin e sistemit të monitorimit me kamera në këto zyra.
2. Marrjen e masave të nevojshme për krijimin e zyrave të posaçme për intervistim me persona të mitur, duke ofruar një ambjent të përshtatshëm që duhet të jetë i rregulluar në mënyrë të posaçme për zhvillimin e bisedave me fëmijët,
3. Marrjen e masave të nevojshme për garantimin e sistemit të ngrohjes në dhomat e sigurisë.
4. Marrjen e masave për riparimin e kamerës së korridorit në ambientet e sigurisë.
5. Marrjen e masave për riparimin e gjeneratorit për furnizim me energji elektrike të ambienteve të sigurisë dhe dhomave të shoqërimit.

Për qëndrimin dhe masat që do merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të ligjit nr.8454, datë 04.02.1999 “Për Avokatin e Popullit”, i ndryshuar.

Duke besuar në mirëkuptimin dhe bashkëpunimin tuaj,

KOMISIONER

ERMONELA XHAFA

Konc. & Dak.
Genci Tërpo
Dak.
Alfred Koçobashi